

Lectio divina y'Idominika ya 30 yo mu mwaka A

Bavukanyi ntore z'Imana amahoro ava ku Mana se w'Umukama wacu Yezu Kristu avyagire mu mitima yanyu no mu buzima bwanyu. Kuri uyu musi w'Idominika ya 30 yo mu mwaka w'amasabamana A, Imana ituyagiye ijambo rihambaye rishimikiye ku kwishura ikibazo abafarizayo babaza Yezu ngo bamutege umutego baronke ico bomuhora mu kumwica ngo: Mwigisha mu mabwirizwa yose irisumba ayandi ni irihe?"

Twibuke ko itegeko rya Musa ryari rigizwe n'amabwirizwa menshi yababa amajana atandatu na cumi na tatu. Bashaka rero bamugeze barabe ko yose ayazi canke ko yohuba ngo bafatire aho mu kumwagiriza. Yezu mu kubishura arabatangaza akabivuga mu majambo avunaguye kandi y'amanage kanatsinda niwe ayatyorora akanayarangura. Kandi twibuke ko Yezu ariko araduga i Yeruzalemu abakuru b'abasaserdoti n' abashingantahe b'ighugu baramubajije ibibazo bongera. Aho i Yeruzalemu ni ho azorangurira vyose. Niho urukundo rw'Idominika ruzokwigaragaza mu kubabara no mu gupfa ku musaraba. Hari ibibazo bitatu bikurikirana abasaduzayo n'abafarizayo baramubajije bifatiye kw'ikori rya Sezari, ku vyerekeye izuka ry'abapfuye hamwe rero n'iki kibazo c'uyu musi cerekeye ibwirizwa rikuru mu yandi. Nawe Yezu arazi gusoma mu mitima y'abantu arazi uburyarya bwacu arazi ingwara zazu, arazi kandi arafise mbere n'umuti wodukiza. Mu nyishu ya Yezu, amategeko mu bwinshi bwayo, ayapfunyapfunyiye muri rimwe ryitwa:ibwirizwa ry'urukundo. Yezu arabereka ko igithe agaciyo amabwirizwa y'Idominika ari Ugukunda Imana n'abayo. Urukundo rw'Idominika n'abantu. Mu gihe Imana ikunzwe atakindi ibangikanijwe kandi urwo rukundo rugaheza rukagaragarira mu rukundo muri benewacu tuvukana muri Kristu no muri Mutima,niho ibwirizwa riba rirangutse bimwe bishemeye. Niho Yezu abavuze ati: Ayo mabwirizwa uko ari abiri: Ugukunda Imana na mugenzawe, niyo shikiro ry'itegeko ryose uko ryakabaye hamwe n'abahanuzi. Abahanuzi bose mu muhamagaro wabo barondera kugarukana ighugu ceranda c'Idominika kukugendera itegeko ryayo. Baguma bibutsa ko Imana itegerezwa gukundwa igasengwa yo nsa ku bw'urukundo rwayo ikunda abantu n'abo bagaheza bagakundana."Urakunda Umukama Imana yawe n'umushaha wawe wose n'umutima wawe wose n'ubwenge bwawe bwose...urakunda mugenzawe nk'uko wikunda wewe nyene" ibwirizwa ry'urukundo risaba ko umuntu arengera amajambo gushika mu ngiro no mu bikorwa mu kwitaho umugenzi. Umugenzi nawe akaba ari umuntu wese uko ari kwose ari nawe gashusho k'Idominika itaboneka ariko ibonekera mu bantu baremanywe agashusho kayo. Yohani niwe abidusigurira ashimitse adutumirira gukurikiza amabwirizwa y'Idominika canecane iry'Urukundo ati:"Bane banje ntidukundane mu majambo no ku rurimi, ariko ni dukundane mu bikorwa no mu kuri.(1Yoh3,18) Ayo mabwirizwa rero uko ari abiri ahinduka rimwe kuko rimwe ridashoboka kurangurwa irindi rishizwe ku ruhande. Ni vyo umutumwa Yohani ashimangira agira ati: "**Twebwe dukunda kuko ariwe yabanje kudukunda. Umuntu yovuga ati: Ndakunda Imana kandi yanka mwenewabo, yoba ari umubeshi.** Nkako nyene uwudakunda mwenewabo abona ntiyoshobora gukunda Imana atabona. **Kandi noneho ng'iri ibwirizwa twahawe : ni uko uwukunda Imana yokunda na mwenewabo**"(1Yoh4,19-21) Dukundanye urukundo rutagira agahemo urukundo rurenzako muri vyose rwiyumanganya kandi rwuzuye ikigongwe niho tuzoba turiko turarangura amabwirizwa y'Idominika. Kandi Umukama Yezu yarabitwemereye ko urukundo dufitaniye nirwo rutugira abigishwa biwe.

Yezu yaratweretse urukundo rw'Idominika. Yaratweretse umugenzi uwariwe mbere aranarenzako kuko yatwitangiye akatwigisha urukundo dutegerezwa gukundana. Erega mbere arashikana insiguro kw'itsitso y'urukundo aho atwigisha urukundo rw'abavukanyi gukunda no kwitangira abandi nk'uko Yohani abiduhanura ati: Ng'iki icatumenyesheje urukundo: ni uko we, Yezu,yatanze ubuzima bwiwe ku bwacu. Natwe turategerezwa gutanga ubuzima bwacu ku bwa benewacu. (1Yoh3,16)

Mukama twigishe kugukunda twame turi abawe bwite twigishe gukundana nk'uko wadukunze, twame tukwizigiye. Twigishe urukundo nyarwo wewe wadukunze gushika aho uza kutubamwo ukatwereka urukundo rw'ukuri.Twigishe gukunda Imana muri benewacu,tukwihebera mu kwihebera benewacu uko bari kwose. Abakakunzi n'abatwanka bose batwereke inyonga zawe batwereke urukundo ubakunda mu rukundo tubereka. Duhe dukunde wewe muri benewacu dutegere ko mu kwitangira abandi tuba turiko turarangura amabwirizwa yawe. Ivyo dukora vyose tubikorane urukundo. Amen

